



SIPA dobila 20 mlađih inspektora ZA VAS NE SMIJE BITI NEDODIRLJIVIH

Uniforma i značka koju nosite donose vam veliku odgovornost. Ne dozvolite da bilo šta ukalja vašu čast, da naruši ugled Agencije i zemlje kojoj služite, poručio je Mektić

Svečana ceremonija polaganja zakletve pete generacije kadeta Državne agencije za istrage i zaštitu (SIPA) održana je jučer u prostorijama ove institucije u Istočnom Sarajevu. Pored novih kadeta, manifestaciji su prisustvovali Dragan Mektić, ministar bezbjednosti BiH, kao i Perica Stanić, direktor SIPA.

Pravna država

Agencija je bogatija za 20 mlađih inspektora, koji su nakon rigorozne selekcije u okviru konkursne procedure za prijem kadeta odabrani kao najbolji. Pohadali su četveromjesečnu osnovnu policijsku obuku u Agenciji za školovanje i stručno usavršavanje kadrova u Mostaru. Nakon uspješno završene obuke, došao je i dan polaganja svečane zakletve. Agencija je u proteklom periodu izrasla u vodeću policijsku agenciju u BiH, ali i šire, zahvaljujući rezultatima stručnih i profesionalnih kadrova. Od kadeta se očekuje da savjesnim i odgovornim radom, posvećenošću policijskom poslu, opravdaju ukazano povjerenje. Nakon intoniranja himne BiH, uslijedile su izjave, a zatim se pristupilo polaganju zakletve.

Mektić je rekao da su pred Agencijom veliki izazovi, te da se jačanjem kadrova od SIPA očekuje da odgovori na očekivanja u

borbi protiv najtežih oblika organizovanog kriminala i terorizma.

- Vašim stopama krenuo sam prije 35 godina i imam za vas poruku koju želim da upamćite i da je se pridržavate u obavljanju poziva. Uniforma i značka koju nosite donose vam veliku odgovornost i ne dozvolite da bilo šta ukalja vašu čast, da naruši ugled Agencije i zemlje kojoj služite. Građani u Agenciji vide branu kriminalu i korupciji, što im vraća povjerenje u pravnu državu, kazao je Mektić.

Ministar Mektić se osvrnuo i na prošlu godinu, kada su u pitanju bezbjednosni izazovi, rekavši kako je bila dosta složena u sigurnosnom smislu, te da se generalno situacija usložnjava. Izraženiji su teži oblici ugrožavanja od terorizma, koji se nameću kao ozbiljna prijetnja BiH.

- Dogodilo se nekoliko terorističkih akata u kojima je bilo žrtava, dok se situacija dodatno radikalizovala. Tu su i djela iz organizovanog kriminala i nisam siguran da smo postigli značajnije rezultate kad je u pitanju presijecanje najtežih oblika. Godina je protekla u jednoj vrsti političkog konflikta. SIPA je napravila određeni napredak, ali mora još bolje. Važno je da imamo i nezavisno tužilaštvo i pravosuđe. Nismo se teritorijalno fokusirali na neko određeno područje, fokusirani

smo na sva mjesta, kao i slučajevima gdje postoje indicije da se radi o krupnim djelima korupcije. Što se mene tiče, kao i agencija u okviru Ministarstva, nema nedodirljivih osoba, pojasnio je Mektić.

Stanić se obratio novim kolegama, kazavši kako ih očekuje velika odgovornost kao pripadnik SIPA, koja je jedan veliki sistem i da se očekuje da posao obavljaju zakonito i časno.

Privilegija

- Treba da budete u službi građana, da se brinete za njihovu bezbjednost. Svoj ugled, kao i ugled Agencije, morate da čuvate. Nadamo se da ćemo ove godine realizovati još jednu generaciju kadeta, kako bi Agencija bila jača, jer policijskih službenika uvijek nedostaje, kazao je Stanić.

Nikola Čevriz, jedan od 20 kadeta, iskazao je veliko zadovoljstvo što je sa kolegama uspješno završio policijsku obuku i na taj način stekao priliku da se zaposli u SIPA.

- Pred nama su novi izazovi i obaveze, a samo temeljan pristup može da bude garant uspješnog i kvalitetnog obavljanja zadataka. Velika je privilegija biti ovdje, jer je to jedan častan posao. Ukazano povjerenje želimo da opravdamo na najbolji mogući način, istakao je Čevriz.

A. BUSULADŽIĆ

Page: 9

Reach: 0

Country: BOSNIA AND HERZEGOVINA

Size: 481 cm2

2 / 2



Mektić i Stanić sa novom generacijom kadeta

Foto: D. CUMIROVIC



Čevrliz: Ovo je častan posao